

Ps. 84: 1, 6

Ge. 62: 4

- 12: 4

Ons Vaak se Boesensende

1 Joh 4: 7-21

1st. Biddag Verkie-
1943 - sing

1 Joh 4: 20 - wie sy broeder ... nie liefhet nie, hoe
kan hy God liefhe?

- Pinkstentyd: tyd van hand in eie boesem steek.

Beoef: afwagting + terugkoming as valk, Kerk,
gemeente, persone. Hier ook belofte van geest.

seën: Gods Gees v. hefde wat Hy wil uitstort.

- Dankbr vir seën ontvang. Ma waarom nie meer?

Vir my net een antw: God kan nie my hefde
aan my openbaar as ek dit nie aan my
ne broer openbaar! Hoe kan ons die seën v

te wagte wees as die vernederings, verbitterings,
gees van amensentelike hly voortweerd?

- Nog nie al: ons staan op die vooraand van
u verkieung. Wat oorkal u gevaal + gedagte -

of u neval dink afin betrokke is of nie:
niemand v. ons sal nie die niebaede taal
niwek wat hant in so'n tyd meester maak

v. mensse: uitwating op geest. lewe

Dou van H.G. ons harte te ondersoek:

net onlangs is dan £1900 vir die kerkskulde gein! En die resultaat? Die Koning van sy Kerk het ook in Burgersdorp sy rentmeesters, want die som is nie alleen bereik nie, maar selfs nog oorskry. Daarvoor aan Hom die eer! Op die eerste Sondag van Junie bring ons kinders, D.V., hul dankoffers en vind die jaarlikse "uitstappie" plaas. Onder leiding van geliefde leraar is ons nou in die middel van die Pinksterbidure wat goed bygewoon word en waarby die sonde in al sy naaktheid geteken word. Ons glo die Heer gaan baie tot 'n nuwe lewe lei en aangord tot stryd teen die owerhede en magte in die lug. Ons mis etlike lede van ons gemeente, wat die Heer tot hoër diens opgeroep het. Veral voel die gemeente die heengaan van broeder oud-ouderling Braan Pelsers van Visfontein, wat onder sulke tragiese omstandighede die lewe verloor het, baie diep. Aan die familie van die broeder wens die kerkraad sy dank en waardering te betuig vir wat sy voorbeeld en invloed in sy kring beteken het. Mag sy werke hom volg!—R.

* * *
DORDRECHT.—Ons het die voorreg gehad om die eerste Saterdagand in Mei Moedersand te hou. Soos gewoonlik is daar mooi paslike musiek en sangstukke deur die lede van die C.J.V. gereël, en was daar 'n mooi opvoering onder leiding van Mev. Ds. Beyers om te toon wat 'n gelowige moeder kan doen in die opbou van haar huisgesin, al is dit byna verwoes deur die invloed van sterke drank. Mev. Beyers en Mej. Venter het ook mooi resitasies gelewer en Ds. Kotzé het 'n mooi en leersame toespraak gehou. Gedurende die maand het die dood weer sy verskyning onder ons gemaak. Op 8 Mei moes ons staan by die graf van die jonge broeder Don Rossouw wat baie skielik weggeroep is terwyl hy en 'n klompie jongmense gesellig bymekaar was. Dit was 'n skok vir die omgewing en sy groot vriendekring om te vernem dat so 'n veelbelovende jongman nie meer daar was nie. Slegs ses dae daarna moes ons weer staan by die graf van die jonge broeder Andries Strydom, seun van oom Piet en tant Drienie. Sy lyding was baie swaar, maar hy het dit met geduld gedra. Ons hart gaan uit in meegevoel tot sy jonge eggenote en familiebetrekkings. Met die Nagmaalsviering is Ds. Beyers bygestaan geword deur Ds. Kotzé, wat al die dienste waargeneem het. Sy boodskappe het ons tot ernstige nadenking gestem. Met die insameling van ons dankoffers het die kinders die som van £25 en die gemeente die mooi som van £1100 opgebring tot dusver. Ons moes ook afskeid neem van Ds. Kotzé wat vir 'n tyd in ons midde was. Ons wens hulle Gods rykste seën toe in hul nuwe werkkring.—MEV. H. A. OELOFSE.

* * *
WARMBAD, TRANSVAAL.—Dit is met groot dankbaarheid dat ons kan terugdink aan ons gemeentelike Eufeeseviering van 1 tot 3 Mei, l.l. Die Vrydagaand het ons die verrigtings begin met die vertoning van die rolprent „Die Lig van die Eeu”. Saterdagoggend het die susters 'n klein basaartjie gereël by die sustersaal. Alhoewel die basaar maar 'n aanvulling van die fees was, het die susters bo verwagting daarin geslaag om oor die £120 in te samel vir ons boufonds. Saterdagand het ons die voorreg gehad om Prof. Kritzinger van die Teologiese Fakulteit, Pretoria, by ons te hê. In sy boeiende toespraak het hy ons die gang van ons Kerk in Transvaal se geskiedenis so duidelik voorgedra dat 'n regte begrip van die verband tussen ons Susterkerke 'n blywende indruk gelaat het. Ons leraar, Ds. Lategan, het die Nagmaalsdiens geleë. Sy ernstige voorbereidingsdienste

het ons tot diepe selfondersoek gedwing en sy boodskap by die tafel ons gehelp om blymoedige belyers te wees. Met die Nagmaalsdiens was die sustersaal gans te klein vir die opkoms. Sondagmiddag het Eerw. Van Rensburg, sendeling in Waterberg vanaf 1920, die diens geleë. Hy het 'n ernstige beroep op alreël gedoen om ons pligte teenoor die Bantoe nie verder te versuim nie. Deur te wys op die mens se wil, Satan se wil en God se wil het hy sy boodskap beklemtoon. Die nabetrachtingsdiens in die aand is geleë deur Ds. Raath van Nylstroom. Weer was die saal te klein. Dit was 'n geseënde afsluiting en ons dank die Here vir die beseleende boodskap. Op 5 Mei het die Here suster Hannie Botha van Doornfontein van ons af weggenem. Die waarde van haar lewe en werk in daardie wyk kan nouliks oorskat word. Met die bedroefde agterblywendes voel ons innig saam. Wonderlik het die Here ons geseën gedurende die afgelope twaalf maande. Nieteenstaande heersende droogtes en ander plaes het die gemeente pragtige bydraes gelewer toe oproepe gemaak is. Spesiale dank is verskuldig aan Mev. Danie Strydom van Kaalfontein, Pretoria, vir haar milde gawe van £100.—J.H.B.

DIE KERK IN DIE HUIS

(Vervolg van bladsy 833)

partypolitieke skema, en word gebring as 'n offer aan die afgod wat moet bevestig word. As die partybelang maar kan bevorder word, kan vriendskap, buurskap, liefde, christelike beginsels maar opgeoffer word. Omkopery, valse gerugte, verdagmakery, spioenasie op mekaar, wantroue, laster, leuens, kwaadwilligheid—daarvoor is bó alles verantwoordelik die diens van daardie afgod in die volkslewe! Is dit werklik Christene wat só kan maak, of is dit handlangers van die satan? Is daar wel nog plek vir Christus en sy beginsels en vir die Gees van God? En dan word daar so vurig gebid vir seën, in die Pinkstertyd sowel as by ander geleenthede. Daar is die seën: dat ons ons hart regmaak teenoor ons medemens, dat ons weer liefhet die broer van ons wat God ook liefhet. Dit kan en dit moet! Ons moet weer word: eers Christen en dan partyman of wat ook al! Maar allereers en konsekwent in alle opsigte: Christen!

Sal ons as lede van een volk en een Kerk dan nie terwille van die eer van God wat daarmee gemoei is, terwille van ons volkskarakter wat daardeur anders te gronde gaan; terwille van die ontsettend ernstige tyd van Godsoordele wat die wêreld tans belewe, en terwille van die heil van ons eie siele en 'n magtige geestelike seën vir ons volk en Kerk, daardie sonde wat ons boesemsonde geword het, die liefdeloosheid, afleë en afswear nie? Want ook hierdie Pinkstertyd het ons weer geleer: „Die vrug van die Heilige Gees is.... liefde.”

Lees: 1 Joh. 4: 7—21; 1 Kor. 13.

Sing: Ps. 65: 12; Ges. 62: 4; Ges. 12: 4.

Die Kerk in die Huus

DIE STILLE UUR

Deur Ds. A. A. VAN SCHALKWYK

Maar die vrug van die Gees is . . . lankmoedigheid.—Gal. 5: 22.

Ook hierdie aantreklike vrug van die Heilige Gees word in die gelowige gekweek. Aan die natuurmens is hierdie karaktertrek vreemd. Hy wil in ongeduld en oorhaas dadelik sy planne uitvoer en sy doel bereik. Verdraagsaamheid beskou hy as swakheid, as iets wat 'n nadelige invloed op die medemens uitoefen en sy bruikbaarheid verminder. Hy kom liever sonder iets klaar as om lank daarop te wag. Hy glo meer aan die deurkap van 'n netelige knoop as om tydsaam die drade los te sukkel.

Onder die invloed van die Heilige Gees word hierdie gesindheid heeltemal verander, so verander dat niemand die vorige mens in die nuwe sal herken nie. Hy openbaar nou 'n verrassende verdraagsaamheid in die huislike kring, in sy daaglikse omgang met ander, selfs teenoor diegene wat hom teegaan en dwarsboom. Hy is oortuig van die waarheid: hy wat glo, sal nie haastig wees nie. Verlang u na so 'n verandering in u geaardheid? Die middel daartoe word hier aangewys. Die vrug van die Gees is lankmoedigheid. Hy werk dit uit in die gemoed van elkeen wat onder sy bestuur is.

Ook by gelowiges ontbreek hierdie vrug maar alte dikwels. In byna alle verhoudinge vertoon hulle die grootste ongeduld en maak hulle deur hul uitlatings hul hele omgewing ongelukkig. En dié wat naaste aan hulle lewe, moet dit in die reël die meeste ontgeld.

Ook met betrekking tot die verwesenliking van ons innigste begeertes ontbreek hierdie lankmoedigheid by baie. Dit val so swaar om vas te hou aan die versekering dat die Here se tyd vir alles die beste tyd is, dat sy gedagtes altyd hoër as ons syne is.

Hoe beskamd is hierdie ongeduld as ons dink aan die Here se lankmoedigheid met ons! Wat verdra Hy nie alles van ons deur die jare heen nie! Dit alleen moes ons al tot meerdere verdraagsaamheid aanspoor, sodat ons enigszins hierin na ons hemelse Vader kan aard. Maar daarby onderneem die Gees om ons haastigheid en ongeduld te oorwin en om ons in alles en teenoor almal lankmoedig te maak. Sal ons onself by vernuwning onder sy invloed stel?

PREEK

ONS VOLK SE BOESEMSONDE

Deur DR. JAC. J. MÜLLER

Wie sy broeder . . . nie liefhet nie, hoe kan hy God liefhê?—1 Joh. 4: 20.

Ons het met die Pinksterdae die hand in die boesem van ons dierbare volk gestee. Kon ons dié seën verwag en ontvang wat God vir ons weggele het, onder al die verwydering en onversoenlikheid en bitterheid wat daar in ons land en in ons Kerk en onder ons volk is? En moet daardie dinge só wees, of kan dit verander en moet dit verander? Sal ons as volk en as enkelinge nie in 'n groot geloofsdaad daardie ontsettende sonde van liefdeloosheid bely nie—ons s'n, ons volk s'n, ons Christene s'n—en daardie steen wegrol sodat God ons weer kan seën nie? Want daar is geen geestelike seën in 'n liefdelose hart nie! En alleen as ons volk gewillig is dat Gods Gees sy vinger mag lê op daardie boesemsonde van ons tyd, en ons oortuig dat dit sonde teen God is, en as ons gewillig is om dit af te lê, sal 'n vloedgolf van geestelike seën en liefde weer ons volk laat herlewe!

Die Onmisbare Voorwaarde tot Seën:
Die Heilige Gees vra ons om ons verhouding teenoor ons medemens te ondersoek. U sê u het God lief, maar wat van u broer? As u u broer nie liefhet nie, dan het u God nie lief nie! As u sê dat u God liefhet, en tog u broer haat, dan lieg u dat u God liefhet. Dit sê nie ek nie, maar God self in sy Woord (1 Joh. 4: 20). Moenie uself bedrieg nie. Moenie dink dit is moontlik dat u reg teenoor God kan staan, en teenoor u medemens in 'n verkeerdê verhouding bly nie, want liefdeloosheid teenoor die medemens is sonde teen God. En as u God waarlik liefhet, sal u nie teen Hom wil sondig nie. As die God van liefde in u woon, sal u u medemens ook kan liefhê en het u hom ook daadwerklik lief. Die Here het u lief en het u broer lief—en daarom moet en kan u hom ook liefhê. As ek Jesus in my het, vul Hy my hart met sy liefde. En Hy kan nie haat of bitter wees nie. Jesus in my wil net liefhê, kan net liefhê. Sy liefde in my gaan uit na my medemens om hom ook lief te hê.

As u dus nie u medemens liefhet nie, maar in twis en verwydering en liefdeloosheid leef teenoor hom, dan het u God nie lief nie, dan leef Jesus nie in u hart nie, dan het u u maar wys-

gemeen dat u ook Gods kind is — of u lewe in gedurige ongehoorsaamheid aan God en u haat u broer wat vir God dierbaar is. En voor u nie daar regmaak en die verhouding van liefde herstel nie, sal u nie geestelik geseen word nie want God sal nie seën waar haat en nyd woon nie; Hy gebied sy seën alleen waar liefde woon!

Hoe sal u lewe lyk as die verhouding tot u medemens reg is en daar liefde is? Laat ons kyk in die spieël wat die hoofstuk van die liefde — 1 Kor. 13 — vir ons voorhou.

Die liefde is lankmoedig (verdraagsaam teenoor ander); die liefde is vriendelik (nie bitsig en venynig in woord of gesindheid nie); die liefde is nie opgeblase en hoogmoedig nie (sien nie op ander neer nie, veroordeel nie, wil nie altyd beter wees as ander nie); die liefde handel nie onwelveoglik nie (in taal of in daad teenoor ander); die liefde soek nie sy eie belang nie (is nie selfsuttig en jaloers nie); die liefde word nie verbitterd nie, en die liefde reken die kwaad nie toe nie (dit kan vergewe).

Hoe lyk u lewe? Is daar sulke liefde teenoor u medemens, teenoor u broer, u volksgenoot, teenoor andersdenkendes? Hoor, só sê God: „Al sou u die tale van mense en engele praat; al sou u al die geheimenisse weet en kennis besit; al sou u geloof hê om berge te versit; al sou u al u goed uitdeel onder ander, en al sou u gewillig wees om u liggaam te laat verbrand (vir 'n beginsel of saak wat u voorstaan) — maar sonder liefde, dan baat dit u alles niks, 'n Mooi lewe 'n uiterlik godsdienstige lewe, 'n opofferende lewe — sonder liefde: God vra nie dit van u nie, maar wil iets anders hê in u lewe. God soek liefde by u!

Mede-Christene, hoe lyk u lewe? Is daar by u die sonde van liefdeloosheid om te bely? O, het die liefde dan onder ons verdwyn? Onder ons, kinders van God, wat weer aan die koue harde wêreld moes wys wat liefde is, en aan hulle liefde moes teruggee, die liefde van Christus? Het u die kenteken van opregte Christenskap verloor: die liefde? God wil u gebruik en die wêreld bereik en seën deur u liefde — en nou? U lewe het onvrugbaar geword — daar is mure wat u afsluit van u mede-Afrikaner en mede-Christen; u godsdiens het kragteloos geword — dit het sy siel kwytgeraak! 'n Gemeente, 'n Kerk, 'n volk sonder liefde — op die pad van sonde teen God en medemens, en van die bedroewing van die Heilige Gees, wie se eerste vrug is: liefde! (Gal. 5: 22.)

Hoe lyk u lewe? Hoe lyk u volk? Is dit een groot christelike familie wat in liefde saamwoon, ondanks verskille wat daar onder broers van dieselfde huis is? Lyk ons volk só? Of tref ons aan in plaas van liefde selfsug en onverskilligheid oor die geestelike en tydelike welsyn van ander, veral van dié wat van ons verskil? Ag, was dit maar net verskille soos so baie ander op elke terrein van die lewe, waarin mense verskillende opvattinge huldig en tog niks verkeerd van mekaar dink of mekaar toevoeg, omdat hulle nie eenders dink nie! Waarom moet by die ver-

skille op politieke gebied so 'n gees geopenbaar word? Waarom kan daar nie verskil word sonder onverdraagsaamheid, liggernagtheid, harde gedagtes en woorde oor mekaar, onvergewensgesindheid, haat en bittere veroordeling en verkleinering van mekaar nie? Waarom kan daar die een die ander nie sy opinie gun en ondanks verskillende opvattinge tog opreg liefhê nie? Watter gees word geopenbaar in ons politieke optrede en geskille? Dit is 'n gees wat in die hel aangesteek is, dit is nie Gods Gees nie! En so staan Afrikaner-Christene teenoor mekaar, verdeeld en verwyderd! En hoe verlang die Kerk en sy dienaars nie na meer eensgesindheid, en dat ons mekaar sal vind by daardie een groot verenigingspunt vir alle Christene nie, die kruis van Jesus? Maar skaars het die kansel gesmeek dat die kerklede mekaar tog moet vind in broederlike liefde en verdraagsaamheid, of die pers en die platform — die bitsige koerantartikels en die venynige toesprake van politieke sprekers — jaag weer die kudde van Christus uiteen — en hits die een teen die ander op! En dan word onderling teen mekaar die verwyte en beledigende aanmerkings geslinger wat die pers en platform die volk geleer het: die een skel die ander uit vir 'n Nazi en 'n vyfde-kolonner, en die ander slinger die kompliment terug van kakie-ridder en kafferboetie! Maar dit maak seer en dit verwyder! En die lede van een volk en lede van een Kerk raak vervreemd van mekaar en staan koud teenoor mekaar met 'n wrok en liefdeloosheid wat diep geherberg word. Waarom moet dit só wees?

Waarom? Omdat ons volk vandag 'n sonde het wat sy boesemsonde geword het! Omdat ons volk 'n afgod opgerig het, wat uiteindelik van sy aanbidders sy vernietigende slagoffers sal maak. En daardie afgod van ons volk is sy partypolitiek! Ook op daardie terreine waar Christus alleen die volle seggenskap moes hê en waar sy wil as wet gegeld het vir die Christen, het die afgod ingedring. Baie Christene staan voor die onbenydenswaardige keuse tussen wat Gods Woord van hulle verwag en wat hul politieke party van hulle verlang. En so sterk is die mag van die afgod, dat byna sonder uitsondering die keuse gedoen word ten gunste van die party en die saak en ten nadele van Kerk en Gods Woord. Die partypolitiek gee in baie mense se lewe die toon aan; die koerant en nie die Bybel nie, stel die gedragslyn vas en verkondig die waarheid; alles word op die altaar van die partypolitiek geoffer. Die partybelange geld die hoogste en meeste. As Gods Woord sê: Het mekaar lief — en die partybelange eis: Haat die andersdenkende, dan word hy gehaat! As Gods Gees sê: Vind mekaar as Christene, en die partybelange vorder: Jaag weg wie nie soos jy dink nie, dan bly selfs Christene van mekaar weg en vermy en veroordeel mekaar en draai die rug op mekaar! Selfs die Kerk, die preke en die gebede in die huis van God word neergehaal om hier of daar in te pas by die

(Vervolg op bladsy 831)

Ons Wyksbidstond

VIR DIE MAANDELIKSE BIDSTOND VAN 1 JULIE 1942

Deur DS. A. A. VAN SCHALKWYK

DIE BESTE KOM NOG

En ons weet dat vir hulle wat God liefhet, alles ten goede meewerk.—Rom. 8: 28.

Die hoop op beter dinge in die toekoms leef in die hart van elke mens. Dit is hierdie hoop wat hom staande hou en laat volhard ten spyte van die rampe, teenspoede en teleurstellings van die lewe. Sy hoop is dikwels ongegrond maar vorm nietemin 'n opbeurende krag in sy lewe. So staan daar vir lang, lang jare manne by hul gruishope op die delwerye en keer hulle met spanning elke sif met klippies om in die verwagting dat die groot diamant wat hulle soveel jare al soek, uiteindelik voor hulle sal blink.

Ook die Bybel maak melding van 'n hoop wat in menseharte leef. Christus word dié hoop van die gelowige genoem. Juis daarom het hierdie hoop 'n vaste grond. Dit rus op die belofte van die Almagtige. Daarom sê die Christen met oortuiging: Die beste kom nog.

In Rom. 8: 18 en 2 Kor. 4: 17 gebruik Paulus die beeld van 'n skaal waarin die teenswoordige en die toekomstige dinge geweeg kan word. En sy bevinding is ook dat die beste nog kom, want die heerlikheid wat aan ons geopenbaar sal word, weeg swaarder as die lyding van die teenswoordige tyd en die verdrukkinge van hierdie lewe is lig in vergelyking met die alles-oortreffende, ewige gewig van heerlikheid wat volg.

Hierin bestaan dus die blymoedigheid van die gelowige dat hy op elke gebied van die lewe en onder alle omstandighede weet dat die beste nog kom, dat alle dinge ten goede meewerk vir diegene wat God liefhet. Laat ons hierdie waarheid ondersoek in verband met die koninkryk van God, die lotgevalle van die volkere, die beproewings van die gelowige.

(1) *Die koninkryk van God.*—In die loop van die wêreldgeskiedenis is die stelling meermale neergelê dat die koninkryk van God so verbreek is dat die einde daarvan as seker bepaal kon word. Dink byvoorbeeld in die Bybelgeskiedenis aan die verdrukking in Egipte, aan die tyd van die rigters, aan die vernietiging van die ryke van Israel en Juda, aan die kruisdood van Christus. En later vind ons dieselfde beskouing in die tyd voor die kerkhervorming, in die jare na die wêreldoorlog van 1914—1918, in die toestand wat vandag heers. As iemand op hierdie tydstippe sou verklaar het of vandag sou beweer dat die beste nog kom, sou dit as onsin bestempel geword het en vandag beskou word. Die skade wat aan die saak van die Here berokken is, weeg so swaar dat wat oorby byna nie in aanmerking geneem kan word nie.

En tog leer die geskiedenis ook in hierdie verband dat God uit die kwade die goeie laat gebore word. So is die volk van Israel deur sy beproewings en loutering gevorm en toegerus om sy ware roeping te vervul en die koninkryk van God op aarde te vestig. Die donker

nag van die middeleeue is vervang deur die helder dag van die Kerkhervorming. Die Wêreldoorlog is gevolg deur 'n opbloeit in christelike Kerke en die toeneming van sendingywer. In die oordele wat nou op die aarde rus, lê die saad van groot en kosbare dinge wat in die belang van die godsryk ingesamel sal word. Vir die saak van die Here lê die beste nog voor, veral as die nuwe aarde en die nuwe hemel daar is en Christus alles is in almal.

(2) *Die lotgevalle van volkere.*—In die verwarring wat daar vandag in die wêreldtoestand bestaan en met die oog op die omwentelinge wat reeds plaasgevind het, sou iemand nouliks die moed hê om te verklaar dat die beste nog kom. Die Bybel sê ook nie dat dit met alle volke die geval sal wees nie, maar alleen vir dié wat Hom liefhet. Aan alle kante hoor ons sprake van nuwe ordes wat na die oorlog vir die mensheid in die algemeen soveel gelukkiger toestand sal skep. Die geskiedenis leer dat dit alleen die orde van God is wat dit kan bewerk. Die bewyse hiervan word oorvloedig in die lewe gevind. Ook deur wat daar met ons volk gebeur het word dit bevestig. Dit is nie dat ons in alle opsigte godvresend is nie, maar tog beklee die diens van die Here by ons volk nog die eerste plek. Die bestuur van alles is in die hande van die Almagtige en dit is alleen van sy besluite waar dat hulle volgens plan uitgevoer word. Dit is sy waarborg dat alles meewerk ten goede vir die volk wat Hom liefhet. Vir dié volk kom die beste nog.

(3) *Die beproewings van die gelowige.*—Sou die stelling dat die beste nog kom gehandhaaf kan word teenoor die bitter beproewings wat so dikwels in die lewe van die gelowige voorkom? Klink dit nie na gevoelloosheid nie om dit byvoorbeeld te sê aan die weduwe by die graf van haar man, aan die wees in sy verlatenheid, aan die jongmense in hul teleurstellings, aan dié wat aanhoudende krankheid en lyding moet verduur, aan dié vir wie die lewe 'n wrak geword het wat langs 'n eenseam strand lê?

Nee, gevoelloosheid is dit nie, maar juis die aanbieding van die hoogste troos. Alleen waar die hemelse Vader beproewing onmisbaar vir sy kind beskou, word dit toegelaat. Die ondervinding is op die oomblik nie 'n saak van blydschap nie, maar van droefheid; later lewer dit 'n vreugdevolle vrug van geregtigheid vir dié wat daardeur geoefen word.

Aan al die swaarbeproefdes van die wêreld gee die Here die versekering dat die beste nog kom. Hy maak weer heel wat stukkend was en gee nuwe waarde aan wat hopeloos gelyk het. Vir Hom is dit nooit te laat nie en almal wat in die regte verhouding tot Hom staan mag gelowig en blymoedig verklaar dat die beste nog kom. En as die lewe verby is, volg die allerbeste, die ewige lewe in heerlikheid by God. Laat ons bid om die versterking van ons geloof in hierdie vertroostende waarheid en dat veral die beproefdes die bemoediging daarvan mag ondervind.

Lees: Rom. 8: 18—30.

Sing: Ges. 20: 1, 5, Ps. 42: 5, Ges. 25: 3 en 5.